



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

30 Janeiru 2013

Tribunál Distritál Dili aplika pena multa ba kazu violénsia doméstika

Iha 28 Janeiru 2013 Tribunál Distritál Dili hala'o julgamentu ba krime violénsia doméstika no kontinua fali audensia leitura ba sentensa iha 29 Janeiru 2013.

Ministériu Públiku akuza katak iha 18 Feveireiru 2011, iha Kampung Alor Dili, arguidu Domingos Colo prátika krime hasoru nia kónjuje Amelia Abi. Motivu husi akontesementu ne'e tanba deit arguidu tarde fila husi servisu fatin no modo laiha mak lezada hirus. Tanba ne'e, arguidu buti lezada nia kakorok, soku iha oin no kotuk.

“JSMP fiar katak tribunál iha konviksaun rasik ba kualker atribuisaun ba forma pena aplikavel sira, maibé pena multa la han-malu ho konseitu violénsia doméstika hanesan krime públiku,” dehan Diretór JSMP Luis de Oliveira Sampaio.

Ministériu Públiku akuza arguidu kontra artigu 145 Kódigu Penál, kona-ba ofensa ba integridade fízika simples no konjuga ho Lei Nú. 7/2010 Lei Kontra Violénsia Doméstika. Ministériu Públiku husu ba tribunál atu kondena arguidu ho pena admoestasaun tanba arguidu konfesa faktus.

Defeza mós husu ba tribunál atu mantéin ho pena admoestasaun ne'ebé hato'o husi Ministériu Públiku.

Iha julgamentu arguidu deklarara katak la'os buti no soku lezada, arguidu basa dala ida iha lezada nia hasan tanba koalia barak. Iha lezada nia deklarasaun ba tribunál hamosu faktus kontradisaun kona-ba motivu husi kazu ne'e, ho nune'e Ministériu Públiku husu akareasaun, tribunál konsidera tuir artigu 116 no 140 Kódigu Prosesu Penál fó tempu ba lezada no arguidu ko'alia loloos motivu husi problema. Tribunál konfirma lezada nia deklarasaun hanesan ho arguidu tanba ne'e Ministériu Públiku hato'o ba tribunál la presiza rona depoimentu husi testamuña tanba arguidu deklarara verdade.

Iha julgamentu leitura sentensa, faktus provadu mak arguidu basa dala ida lezada nia hasan sorin loos. Faktus la provadu mak arguidu la buti kakorok, soku iha oin no kotuk.

Bázeia ba faktu hirak ne'e, tribunál deside pena multa ho valor \$ 37.50 ne'ebé sei selu gradualmente \$ 0.50 sentavos kada loron durante loron 75 nia laran. Wainhira arguidu la kumpri pena refere, tribunál sei aplika pena alternativa loron 50 iha prizaun.

Kazu ne'e rejista iha tribunál ho Número Prosesu: 526/2011/TDD. Julgamentu prezide husi Dra. Jasinta Correia da Costa. Dr. Vicente Brites husi Ministériu Públiku no arguidu hetan defeza husi Dr. Tomas Goncalves advogadu privadu (estajádu).

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883 / 77810637

www.jsmp.tl